

परमेश्वरक वैदक देश मिं

यहोशू, परमेश्वरक सेवक

(यहोशू ?)

परमेश्वरक सेवक मोशेशक मरणक बाद परमेश्वरल यहोशू धैं कौ, "म्यर सेवक मोशेश मरि गो। यैक लिजी तु उठ, और यौं मैसों कैं यरदन गाड़क पार उ देश मिं ली जा, जकें दिणक वैद मील इनर दगाड़ करि रॉखौ। ऐल मी यौ पुर देश तुमुकें जरूड द्यूल। और क्वे लै तुकें नि हरै सकॉल। जस मी मोशेशक दगाड़ रुंछी, उस्सै त्यर दगाड़ लै रूल। और न मी तुकें छोडुंल और न कभै त्यागुंल। तु डर इन, हिम्मत धर, किलैकि त्वी उ मैस छै, जो यौं मैसों कैं लडै मिं जितैबेर उ देश मिं ली जालै। और तु म्यर सेवक मोशेशक देई नीमों कैं आपण मन मिं धरिये। और दिन रात उनुमिं ध्यान लगाये, और हमेशा उनर पालन करिये। जब तु यस करलै, तब तु सफल ह्वलै और अधिल कै आशीश पालै। यैक लिजी तु डर इन और हिम्मत कर। और जां लै तु जालै, वां मी त्यर दगाड़ रूल।"

तब यहोशूवल इस्रायलियों धैं कौ, "ऑब तुम तैय्यारी करो, किलैकि हमुल तीन दिनक भितेर यौ यरदन गाड़ पार करिबेर उ देश मिं आपण कब्ज करण छु, जो परमेश्वरल हमुकें दी रॉखौ।"

तब इस्रायलियोंल यहोशू कैं जबाब दे, "जो हुकुम तुमुल हमुकें दी रॉखीं, हम उनर पालन करुंल। और जां लै तुम हमुकें भेजला, हम वां जूल। और जसिक हम मोशेशक सब हुकुम मानछी, उसिकै तुमर लै मानूल। और यस हो कि जस परमेश्वर मोशेशक दगाड़ रई, उस्सै उं त्यर दगाड़ लै रओ। यैक लिजी तुम डरो इन और हिम्मत धरो, और जो लै तुमर खिलाफ हवाल, और तुमर हुकुमों कैं नि मानॉल, उ जरूड मारी जाँल।"

भेद लिणी यरीहो मिं

(यहोशू २)

यैक बाद यहोशूवल द्वी मैसों कै कनान देश मिं यौ कैबेर भेजौ, कि तुम वांक भेद ल्याया। खाश कर जो यरीहो नगर छु, वां जाया, और वीक पत्त करिबेर आया कि वां के और कस छु? हम कसिक वां हम्मल करि सकनू? तुम यौ जरूड पत्त करिबेर आया।

और यरीहो नगर यस छी, कि वीक चारों तरफ बे ठुलि दिवाल बणी छी, और उ भौत चाकेई छी।

और जब भेद लिणी यरीहो पुर्जी, तब उनुल आपण रुणक लिजी ड्यार चा, जां उं रैबेर भेद ली सको। तब उं एक स्यैणिक घर ड्यार चाणक लिजी गई, जैक नाम राहाब छी। उ एक धंध करणी स्यैणि छी।

जब यरीहोक रॉज कै यौ पत्त चलुं कि द्वी मैस यांक भेद लिणक लिजी ऐ रई, और उनर ड्यार राहाबक घर मिं छु, तब वील राहाबक पास आपण सिपैनों कै भेजौ, कि जो द्वी मैस त्यार घर ऐ रई उनुकै तु हमुकै सौप दे। लेकिन राहाबल भेद लिणियों कै पॉख मिं अल्लिसक झाड़ मिं लुकै हैछी, और वील रॉजक मैसों धै कौ, "भय्या, द्वी मैस म्यार घर ऐ राछी, पर उं अन्यार हुण है पैली यांबे न्है ग्याछी।" उनुल कौ, "अच्छा?" राहाबल उनुधै कौ, "जल्दी जाओ, तुम उनुकै आल्लै पकड़ि ल्यला।" और यौ सुणिबेर उं मैस उनुकै पकड़णक लिजी जानै रई।

तब राहाबल भेद लिणियों धै कौ, "मिकै पत्त छु, कि तुम परमेश्वरॉक मैस छा और परमेश्वरल यौ देश तुमुकै दी है। हमुल तुमर बारि मिं सुणौ, कि परमेश्वरल तुमुकै मिस्र देश बे कसिक निकालौ, और कसिक मैसोंक हात बे बचा। यैक लिजी यांक मैस तुम इस्रायलियों कै देखिबेर भौत डरनी और तुमर सामण हमेरि के हिम्मत न्है। किलैकि तुमर प्रभु स्वर्गक परमेश्वर छन और यौ पुर दुनी मिं लै। ऐल जस बरताव मील तुमर दगाड़ करौ, उस्सै तुम लै म्यर दगाड़ करिया। और तुम कसम खाओ कि जब परमेश्वर तुमुकै यौ देश और नगर द्याल, तब तुम म्यर परिवार और रिशतदारों कै के नि करला। उनुल कौ, "ठिक छु, हम कसम खानू।" तब राहाबल पछिनकि खिड़कि बे एक लाल ज्यौड़ बाँदौ जैल उं वांबे भाजि सको, किलैकि वीक घर उ नगरक दिवालक बीच मिं बणी छी। और उनुल राहाब धै कौ, "यौ ज्यौड़ यांबे नि खोलिये, यैल हम तुमर घर कै पछ्याणुंल। और जो तुमर घर भितेर

ह्वाल उं बचॉल, लेकिन जो तुमर घरक भ्यार ह्वाल, उनुकें हम नि बचै सकुं। और तु हमर बारि मिं कैकणी के नि बताये।" तब राहाबल कौ, "ठिक छु। तुम डॉन मिं जाओ और जब तलक रॉजक मैस वापिस नि ऐ जाँन, तब तलक वैं लुक रया, किलैकि उं तुमुकें पकड़णक लिजी जै रई।" तब उं खिड़कि बे तेलि उतरिबेर डॉन मिं न्है ग्याय। जब रॉजॉक मैसॉल उनुकें तीन दिन तलक सब जाँग हुनौ, पर उं नि मिल और उं रॉजक पास वापिस लौट ग्याय। यैक बाद भेद लिणियोंल डॉन बे यहोशूवक पास वापिस ऐबेर बता, "वांक मैस हमेरि डरिल कॉमण लागीं। किलैकि परमेश्वरल हमुकें उ देश दी है।"

यहोशूवकि इज्जत बढ़णै

(यहोशू ३)


तब यहोशू रात्ति उठिबेर सॉर इस्रायली मैसोंक दगाड़ बाँट लागिबेर यरदन नामक गाड़ मिं पुजौ।

वां प्रभु परमेश्वरल यहोशू धैं कौ, "आज बे मी सब इस्रायली मैसों मिं तेरि इज्जत बढ़नू। यैल उं जाण ल्याल कि जस्सै मी मोशेशक दगाड़ रयूँ, उस्सै त्यर दगाड़ लै रूँ। वैदक संदूक कैं टिपणिवॉलों कैं तु यौ हुकुम दिये, कि गाड़ मिं पुजिबेर पाणि मिं ठाँड़ है जाया।"

यैक लिजी यहोशूवल याजकों धैं कौ, "परमेश्वरक वैदक संदूक लिबेर तुम मैसोंक अघिल-अघिल बे गाड़ पार जाणक लिजी हिटो।" यौ सुणिबेर उनुल उस्सै करौ।

यरदन गाड़क पाणि फसल कटाइक सब दिनों मिं आपण मात्रा हबेर जादे रूँछी, लेकिन जस्सै वैदक संदूक कैं ली जाणियोंक खुट यरदन गाड़ मिं पड़ी, उस्सै गाड़क पाणि सुक गोय। तब सब इस्रायली ऐरामल पार गेई।

जब तलक सब इस्रायली मैस पार नि पुजि ग्याय, तब तलक प्रभु परमेश्वरक वैदक संदूक ली जाणी याजक बीच गाड़ मिं रुकि राछी। और सबनक पार पुजणक बाद, याजक लै वैदक संदूक लिबेर पार पुजी, तब गाड़क पाणि पैलियक बारबर है गोय। उदिन बे यहोशूवक इस्रायलियोंक बीच मिं यस इज्जत हुण लागीं, जस उ हबेर पैली मोशेशक हुँछी।



राहाबक घर बे
भेद लिणिवॉल मैस
ज्यौड़ल उतरणई

कनान देश मिं

(यहोशू ५:१, १०-१२)

जब वांक रुणी सब मैसौल यौ बात सुणी कि प्रभु परमेश्वरल इस्रायलियोंक लिजी यरदन गाड़ मिं बाँट बना और उनुल यौ गाड़ पार करि है, तब सब कनानी भौतै डरण लागीं, और इस्रायलियोंक डरिल उनेरि हालत खराब है गई।

इस्रायलियोंल गाड़ पार करणक बाद आपण ड्यार गिलाल नामक जाँग मिं लगाई। तब उनुल उ म्हेणक चौदू दिनक ब्याव बखत वां आपण छुटकारक त्यार मना। किलैकि परमेश्वरल मिस्र बे जाण बखत उनुधैं कै रॉखछी, कि यौ दिन तुमर लिजी एक खाश यादगारिक दिन हवल और हर साल मिं तुम यौ दिन म्यर यादगारिक लिजी यौ त्यार मनाया। यौ त्यारक दुसर दिन उनुल यौ देश मिं पैद हई अनाजक र्वाट खाई। और उदिन बे उनुकैं रेगिस्तान मिं रोज स्वर्ग बे मिलणी "मन्ना" बन्द है गोय, और यौ फिर कभे उनुकैं नि मिल। किलैकि उं उ देशक पैद हई अन्न खाँण भैटीं।

यरीहोक नांश

(यहोशू ५:१३-१५, ६)

इस्रायलियोंक डरिल ऐल यरीहो नगरॉक मैसौल वांक बाँट चारों तरफ बे पट्ट बन्द करि दे। न क्वे उ भितेर ऐ सकछी और न क्वे वांबे जै सकछी।

जब यहोशू यरीहो नगरक नजिक पुजौ, तब वील आपण सामण हात मिं तलवार थाँमी प्रभु परमेश्वरक दूत देखौ। यहोशूवल उनुधैं पुछौ, "के तुम हमर तरफ छा या हमर दुश्मणोंक तरफ?" वील उधैं कौ, "मी प्रभु परमेश्वरक सेनाक सैप छूं, और ऐल यां ऐ रयूं।" यौ सुणिबेर यहोशूवल उनुकैं पैलाग करिबेर कौ, "मी तुमर दास छूं, म्यर लिजी तुमर के हुकुम छु?" दूतल उनुधैं कौ, "तु आपण ज्वात खोल, किलैकि जां तु ठाँड़ है रौछै, उ प्रभु परमेश्वरक पवित्र जाँग छु। देख, मी यौ यरीहो नगर, यांक रॉज और यांक सब ताकतबर सिपैनों कै त्यर हात मिं सौपनू। तुम यस करिया, रोज दिन मिं तुम सब मैस पुर यरीहो नगरक एक चक्कर लगाया। और तुम परमेश्वरक वैदक संदूक कै लै आपण दगाड़ ली जाया, और सात याजक भुकारों कै बजैबेर यैक अधिल बे जॉल। तुम छै दिनों तलक यस्सै करिया।¹ लेकिन

¹ भुकार - यौ भुकार भेड़क बोकरियाक सींगोल बनाई छी।

सतूं दिन तुम सब यरीहो नगरक एकक बदाव सात चक्कर लगाया। और तुमर दगाड़ याजक जोर-जोरल भुकौर बजून-बजूनै हिटॉल। और आखिर मिं भुकौरकि अवाज भौत तेज करि दिया। यौ जोरकि अवाज सुणिबेर तुम सब लड़ैक नॉर लगाया। तब यौ नगरकि चारों तरफकि दिवाल जड़ बे ढै जालि जैल तुम सिद्द अधिल बढिबेर नगर मिं हम्मल करि दिया।"

तब यहोशूवल याजकों कै बुलैबेर कौ, "परमेश्वरक यौ वैदक संदूक कै लियो और तुमुमिं बे सात याजक भुकौर बजून-बजूनै हमर अधिल बे हिटो।" तब वील इसायलियों कै हुकुम दे, "अधिल बढिबेर यौ नगरक चक्कर लगाओ। थ्वाड़ ताकतबर मैस अधिल बे बाँट लागो, उनर पछिल बे भुकौर बजूणी याजक, इनर पछिल बे वैदक संदूक ली जाणी, और आखिर मिं बकाइ सब सेनाक मैस रया। तब जस यहोशूवल कौ, उनुल उरुसै करौ।

यहोशूवल उनुकै हुकुम दी रॉखछी कि ऐल तुम लड़ैक नॉर नि लगाया, और नै तुमर खाप बे क्वे अवाज निकलो। पर जब मी बतूल, तब तुम उदिन लड़ैक नॉर लगाया। इसिक एक बार उ नगरक चक्कर लगूणक बाद उं सब वापिस ड्यारों मिं ऐ ग्याय।

तब इसिकै उनुल छै दिनों तलक यौ नगरक चक्कर लगा। तब सतूं दिन मिं यहोशूवल मैसों धै कौ, "आज हम एकक बदाव सात चक्कर लगूल। जब सतूं चक्कर मिं याजक जोरल भुकौर बजॉल, तब तुम लड़ैक नॉर लगाया, किलैकि परमेश्वरल यौ नगर हमुकै दी है। यैक लिजी सॉर नगर कै नांश करिबेर परमेश्वरक हुकुम कै पुर करो। लेकिन तुम राहाब, वीक घरवालों और वीक रिशतदारों कै छोड़ि



इसायली बाँज बजैबेर यरीहोक चक्कर लगूणई

दिया, किलैकि वील हमार भेद लिणियों कै यांक मैसों बे बचाछी। तुम यांक क्वे लै चीजक लालच नि करिया, सब परमेश्वर कै भेट चढै दिया। क्वे लै मैस जो यौ चीजोंक लालच करल, वीक कारणल हम सब लै भारि मुशीबत

मिं पड़ि जूल। तुम सुन, चांदि, पितव और लुवक सब चीज-बस्तों कै शुद्ध मानिबेर उनुकै परमेश्वरक लिजी अलग धरिया।"

तब उनुल यस्सै करौ और जब याजकोल सतू चक्कर मिं जोरल भुकौर बजा, तब सबोल जोर-जोरल लड़ैक नॉर लगाई। और उ बखतै यरीहो नगरक दिवाल जड़ बे ढै गई!

तब उनुल सिद्द अधिल बढिबेर यरीहो नगर कै जिति ले, और उनुल उ नगरक सब मैसों कै खतम करि दे। लेकिन यहोशूवल भेद लिणियों कै हुकुम दे, "आपण वैदक अनुसार जैबेर तुम राहाब और वीक सब रिशतदारों कै भ्यार ल्याओ।" तब भेद लिणी राहाब और वीक सब रिशतदारों कै निकालिबेर ल्याई। और आज तलक वीक वंशज इस्रायलियोंक दगाड़ रुनी।

इसिक परमेश्वरल यहोशूवक मधत करिबेर उकै आशीश दे, और वीक नाम पुर कनान देश मिं फैला।

पुर देश मिं जीत

(यहोशू ११:१६, २३, २३:१-१३)

यरीहो कै हरैबेर इस्रायलियोंल भौत दुसॉर अलग-अलग नगरों मिं हम्मल करिबेर उनुकै लै जिति ले। जस परमेश्वरल आपण सेवक मोशेश धैं कै रॉखछी, उसिकै यहोशूवल पुर देश कै आपण कब्ज मिं करिबेर उकै पुर इस्रायलियोंक वंशजोंक हिसाबल उनुकै बाँट दे, कि उं उमिं आपण कब्ज करो।

यैक बाद जब यहोशू बुड़ है गोय, उ बखत इस्रायलियों और उनर दुश्मणों मिं शांति छी। तब वील इस्रायलियोंक पधानों कै बुलैबेर उनुधैं कौ, "देखो, आँब मी बुड़ है गोयूं, और मरणिवाँल छूं। तुमुल देखि रॉखौ कि परमेश्वरल तुमर लिजी के-के करौ। उनुल हमर दुश्मणों कै हरै दे, और जो जातिक मैस यां आइ तलक बचि रई, उनुकै लै उं यांबे निकालिबेर भजै द्याल। और यरदन गाड़ बे लिबेर समुद्र तलक पुर देश तुमर हवाल। तुम हमेशा हिम्मत धरिया और मोशेशक नीमोंक पालन करिया, और उनरै अनुसार हिटिया। और तुम कभै भुलिबेर लै यौं मैसोंक दगाड़ मेल-जोल नि करिया, और न तनार द्याप्तोंक पुज करिया। और जस आज तलक तुम आपण परमेश्वरक भक्ती मिं मगन छिया, उसिकै आइ लै रया। परमेश्वरल तुमर लिजी ताकतबर जातियों कै तुमर सामण बे भजै दे। और जां तलक तुमेरि

बात छु, क्वे ले जातिक मैस तुमर सामण ठाँड़ लै नि रै सकन। तुमुमिं बे यक्कै झणी हजारों कै भजै सकुं, किलैकि परमेश्वर आपण वैदक अनुसार तुमर तरफ बे लडुं। यैक लिजी तुम आपण परमेश्वरक दगाड़ प्रेम करो, और उनेरि अराधना करणक लिजी हमेशा तैय्यार रओ।

अगर कभै तुम भुलिबेर लै आपण बीच मिं बची यौ जातियोंक दगाड़ मिलला और उनर दगाड़ ब्या-बरियात करला, तब जाण लिया कि परमेश्वर तुमर बीच बे तौ जातियों कै अधिल कै कभै तुमर सामण बे नि निकालल। जब तलक तुम यौ खुशहाल देश मिं जो प्रभु परमेश्वरल तुमुकै दी रॉखौ, यैमिं नि उजड़ला, तब तलक उं तुमर लिजी जाव और फांसिक फन्द जाँस बणियै रौल।"

यहोशूवकि आखिरी बात

(यहोशू २४)

तब यहोशूवल सब मैसों धै कौ, "प्रभु परमेश्वर यस कूणई, कि भौत साल पैली तुमार पुरखा इब्राहीमक बौजू फरात गाड़क पार रंछी, और दुसॉर द्याप्तोंक पुज करछी। फिर मील इब्राहीम कै फरातक पार बे निकालिबेर पुर कनान देश घुमा, और वीक वंश कै बढ़ा। और मील उकै एक च्यल दे जैक नाम वील इसहाक धरौ। और मील इसहाक कै द्वी च्याल लै देई, याकूब और एसाव। और मील एसाव कै सेईरक पहाड़ी प्रदेश दे, कि यौ वीक कब्ज मिं है जाओ। लेकिन याकूब और वीक च्याल मिस्र देश नहै ग्याय। फिर मील मोशेश और हारून कै मिस्र देश भेजिबेर आपण चमतकराक काम दिखाई। और मिस्रियों मिं आपण मुशीबत खितणक बाद तुमुकै मी वांबे निकालि ल्यायूं। और जब तुम लाल समुद्रक पार पुजछा, तब मिस्री रथों और घ्वाड़ सवारोंक दगाड़ तुमर पिछ करणक लिजी लाल समुद्र तलक आई। तब तुमुल मिधै बिनती करी और मील तुमेरि बिनती सुणिबेर मिस्रियोंक और तुमर बीच मिं अन्यार करि दे, और उनुकै समुद्र मिं डुबै दे। और यौ सब तुमुल आपण आँखों देखि रॉखौ। फिर तुम भौत दिनों तलक रेगिस्तान मिं राछा। जब तुम यरदन कै पार करिबेर यरीहो आछा, तब तुमुकै वांक मैसोंक दगाड़ लडै करण पड़ी, लेकिन मील उनुकै तुमर हात मिं सौप दे। और मील दुसर जातियों कै लै तुमर लिजी हरै दे। यौ सब तुमार तलवारोंल नि हौय, लेकिन मील करौ। और मील तुमुकै यसि जमीन दे, जमिं तुमुल मेहनत नि

करि, और रुणक लिजी यॉस नगर देई, जनुकें तुमुल नि बणाय। और जो अंगूर और जैतूनक बगीच तुमुल नि लगाय, उनरै फल तुमुल खाई।

यैक लिजी ऑब तुम आजै फैसॉल करि लियो कि कैक सेवा करला? उं द्याप्तोंक जनेरि पुज तुमार पुरखा फरातक पार करछी, या यांक रुणी एमोरियोंक द्याप्तोंक जनर देश मिं तुम रुंछा, या परमेश्वरक? लेकिन जां तलक मेरि बात छु, मी आपण पुर परिवारक दगाड़ परमेश्वरक सेवा करनू।

तब मैसॉल कौ, "यस कभै नि हवल, कि हम आपण प्रभु परमेश्वरक कैं छोड़िबेर कवे दुसर द्याप्तोंक पुज करूं। किलैकि उं हमर परमेश्वर छन, जो हमुकें मिस्र देश बे निकालिबेर ल्याई। और उनुल हमर देखन-देखनै चमतकराक काम करीं। और जो देश और जातियोंक बॉट हम आयूं, उनुल वां लै हमेरि देख-भाल करी। और परमेश्वरल हमर लिजी यौ देश मिं रुणी सब जातियों कैं निकालि दे, यैक लिजी हम लै परमेश्वरक सेवा करूंल। किलैकि वी हमर प्रभु परमेश्वर छन।"

जब यौ सब बात हई, उ बखत परमेश्वरक सेवक यहोशू एक सौ दस सालक छी। और वीक बाद उ मरि गोय। तब उनुल यहोशू कैं पहाड़ी प्रदेशक उत्तर दिशा मिं दफनै दे।

इस्त्रायलियोंल परमेश्वरकें छोड़ि दे

(न्यायियों २:१०-१५)

जब उ पीढ़ीक सब मैस मरि ग्याय, तब एक नई पीढ़ी है जनुल परमेश्वरक अद्भुत काम आपण आंखोंल नि देखि रॉखछी। तब उनुल उ काम करौ, जो परमेश्वरल मना करि रॉखछी। उनुल बाल नामक द्यप्तक और सब पराड़ द्याप्तोंक पुज करिबेर आपण पुरखोंक परमेश्वरकें छोड़ि दे, जो उनुकें मिस्र देश बे ल्यै राछी। और उनुल यौ करिबेर परमेश्वरक रीश कैं आपण लिजी बढ़ा। यैक लिजी परमेश्वरल उनुकें यौ सजा दे कि दुसॉर जातिक मैसॉल उनुमिं हम्मल करिबेर उनुकें हरै दे, और उनार सब गोरु-बाछों और फसल कैं लुटिबेर उनुकें कांकै नि धर। और जब उं आपण दुश्मनोंक दगाड़ लड़णक लिजी जांछी, तब परमेश्वरक हात उनर खिलाफ उठछी, किलैकि उनुल परमेश्वरक कौय नि मानछी। तब इस्त्रायलियोंल मन-फिराव करिबेर फिर परमेश्वरक हुकुम मानौ, लेकिन जब परमेश्वर उनुकें छुड़ै दिंछी, तब इस्त्रायली फिर उनुकें भुलिबेर द्याप्तोंक पुज करण लागछी।

ओत्नीएल इस्रायलियोंक नेता

(न्यायों ३:७-३०)

इसिक एक बार फिर इस्रायलियोंल वी काम करौ, जो प्रभु परमेश्वरक नजर मिं नक छी। उं आपण प्रभु परमेश्वर कै भुल ग्याय और बाल द्याप्त और अशेराह देवीक पुज-पाँठ करण लागीं। यैक लिजी प्रभु परमेश्वरक रीश इस्रायलियों मिं भड़की और उनुल उनुकै मेसोपोटामियोंक रॉजक हात मिं दी दे और इस्रायलियोंल आठ साल तलक वीक गुलामी करी। तब इस्रायलियोंल प्रभु परमेश्वरक दुहाई दे और यौ देखिबेर प्रभु परमेश्वरल इस्रायलियोंक लिजी एक छुडूणी मैस ठैरा, जैक नाम ओत्नीएल छी। प्रभुक आत्मा उमिं उतरौ और उ इस्रायलियोंक नेता बनौ, और उ मेसोपोटामियाक रॉजक दगाड़ लड़ै करणक लिजी गो। तब प्रभु परमेश्वरल उ रॉज कै वीक हात मी सौंप दे। इसिक इस्रायलियोंक देश मिं चालीस साल तलक शांति है गई। यैक बाद ओत्नीएल मरि गय।

एहूद मोआबी रॉज कै मारुं

(न्यायों ३:१२-३०)

यैक बाद इस्रायली परमेश्वर कै फिर छोड़िबेर फिर पाप करण लागी। यैक लिजी प्रभुल मोआबक रॉज एग्लोन कै इस्रायलियोंक खिलाफ ताकतबर बना। एग्लोनल इस्रायलियोंक दगाड़ लड़ै करिबेर उनुकै आपण कब्ज मिं करि ले। इस्रायलियोंल अठार साल तलक मोआबक रॉज एग्लोनक गुलामी करी। तब फिर इस्रायलियोंल प्रभु परमेश्वरक दोहाई दे, और परमेश्वरल उनर लिजी एक छुडूणिवाँल छांटौ। यौ बिन्यामीनक कुलक एहूद छी, जो बाँ हातल काम करछी। इस्रायली यैक हात मोआबक रॉज एग्लेनक लिजी करि भेजछी। एहूदल आपण लिजी एक यसि तलवार बनै रॉखछी, जो एक हात लमब छी और जैमिं द्विवै तरफ धार छी, उ उकै आपण दैण जाडड़ मिं लुकैबेर रॉज कै करि दिणक लिजी गो। और कर रॉज कै दिबेर उ आपण दगाड़ुवाँक दगाड़ गिलगाल तलक आ, वां वील उनुधै कौ, "तुम हिटो, मी बाद मिं ऊँल।" और वापिस रॉजक पास ऐबेर रॉज धै कौ, "म्यर पास तुमर लिजी एक गुप्त खबर छु।" उ बखत रॉज महलक सबों हबेर उँच हावदार कम्न मिं बैठि रोछी। रॉजल कौ, "कटूकी रौ।" तब रॉजल आपण सेवा-टहल करणियों कै वांबे भ्यार भेजि दे। तब एहूदल रॉज धै कौ, "म्यर पास परमेश्वरक तरफ बे

तुमर लिजी एक खबर छु।" यौ सुणिबेर रॉज आपण गद्दी बे ठाँड़ उठौ। तब एहूदल आपण बाँ हातल तलवार निकालिबेर रॉजक पेट मिं भौंकि दे। और तलवार बीन तलक पुर वीक पेट मिं न्है गई, और रॉजक गू-मूत सब भ्यार निकलि गोय। और एहूद तलवार उस्सै छोड़िबेर वांबे भाजि गोय। एहूदल कम्पक द्वार बन्द करी और उमिं घुच लगैबेर वांक खिड़किक बाँट भ्यार उनै रौ। एहूदक जाणक बाद रॉजक सेवक आई, लेकिन उनुल द्वार भितेर बे बन्द देखिबेर सोचौ कि रॉज टटिघर मिं जै रई, और उं रॉजक इंतजार करण लागी। जब उं इंतजार करन-करनै थाकि ग्याय, तब द्वार टोड़िबेर उनुल देखौ कि उइ इजा, यौ के हौ, हमार रॉज लमतम कसिक हई!"

लेकिन उनर द्वार खोलणक इंतजार करण बखत, एहूद वांबे भाजि गोय। और वील एफ्राइमक डॉन मिं जैबेर भुकौर बजा। वील इस्रायली मैसों कैं वां जॉम करिबेर उनुधै कौ, "म्यर पछिल-पछिल हिटो। किलैकि आज परमेश्वरल मोआबियों कैं तुमर हात मिं करि है।" उं एहूदक पछिन-पछिन गई। तब उनुल यरदन गाड़ पार करणी जांग तलक मिं आपण कब्ज करौ, और उनुल क्वे लै मोआबियों कैं वां पार नि जाण देय। यैक बाद उनुल मोआबी सेना मिं हम्ल करौ। उनुल यौ बखत मोआबी फौजाँक भौतै ताकतबर और शक्तिवान सिपै मारि डालीं। और उनर एक लै सिपै नि बचि पाय।

यौ दिन बे इस्रायलियों कैं मोआबी जातियोंक मैसों बे छुटकार मिलि गोय। और इसिक इस्रायलियोंक देश मिं अस्सी साल तलक शांति रै।

दबोरा और बारक

(न्यायों ४:१-२३)

लेकिन एहूदक मरणक बाद इस्रायलियोंल फिर वी काम दुबार करीं, जो परमेश्वरक नजर मिं खराब छी। यैक लिजी प्रभु परमेश्वरल उनुकैं कनानी जातिक रॉज याबीनक हात मिं सौंप दे। याबीन हासोर नगर मिं राज करछी, और सीसरा वीक फौजक सैप छी। याबीनक पास लुवाँक नौ सौ रथ छी और वील बीस साल तलक बेरहमील इस्रायलियों मिं अत्याचार करो। तब इस्रायलियोंल फिर प्रभु परमेश्वर कैं पुकारौ।

उ बखत दबोराह नामक एक स्वैणि जो एक नबी छी, इस्रायलियों कैं राय दिंछी। उ एक थांकोवक बोटक ताव बे बैठि रुंछी, और इस्रायली यां आपण न्याय करूणक लिजी उंछी। दबोराल बारक नामक मैसक पास जुबबी

भेजिबेर उकै आपण पास बुलवा। तब दबोराल उधैं कौ, "इस्त्रायलियोंक प्रभु परमेश्वर तुकै यौ हुकुम दिणई कि जा, और ताबोर डॉन मिं नफताली और जबूलून कुल बे दस हजार मैसों कैं जाँम करिबेर ल्या। मी त्यर दगाड़ मुट-भेड़ करणक लिजी याबीनक फौजक सैप सीसरा कैं वीक रथोंक और फौजक दगाड़ किशोन गाड़क सामण खींचबेर ल्यूल, तब मी उकै त्यर हात मिं सौप द्यूल।"

यौ सुणिबेर बारकल दबोराह धैं कौ, "अगर तुम म्यर दगाड़ आला, तब मी लै जूल। दबोराल कौ, "ठिक छु, मी तुमर दगाड़ ऊंल। लेकिन यैक लिजी कि त्वील मिधैं यौ पुछौ, यौ जीतक इनाम त्यर नि हो, लेकिन क्वे स्यैणिक ह्वल। किलैकि प्रभु परमेश्वर फौजक सैप कैं एक स्यैणिक हात मिं करि द्याल।" यैक बाद दबोराह तैय्यार हबेर बारकक दगाड़ केदश नगर गे।

बारकल जबूलून और नफताली कुलॉक मैसो कैं केदश नगर बुलवा, और दस हजार मैस वांबे उनर दगाड़ गई।

जब सीसरा कैं यौ पत्त चलौ कि बारक ताबोर डॉन मिं जै रौ, तब वील लुवाँक नौ सौ रथ और आपण पुर फौज किशोन गाड़क बगड़ मिं बुलवै।

तब दबोराहल बारक धैं कौ, "जा, आज उ दिन छु, जब प्रभु परमेश्वर त्यर हात मिं सीसरा कैं सौप द्याल। किलैकि प्रभु परमेश्वर त्यर अधिल-अधिल लड़ै करणक लिजी ऐ रई।" यैक लिजी बारक ताबोर डॉन बे तेलि गो। वीक पछिल बे दस हजार सिपै लै तेलि गई। तब प्रभु परमेश्वरल सीसरा और वीक सिपैनोंक आपस मिं भगदड़ मचै दे, और सीसरा रथ बे उत्तर बे पैदल भॉजण लागौ। तब बारकल सीसराक सिपैनोंक पिछ करिबेर उनुकैं मारि डॉलौ। और एक लै सिपै नि बच।

लेकिन सीसरा पैदल भॉजनै केनी जातिक हेबरक स्यैणि याएलक ड्यार मिं पुजौ, किलैकि इनर दगाड़ वीक मालिककि जाण-पछ्याण छी। याएलल ड्यार भितेर बे भ्यार ऐबेर सीसरा धैं कौ, "भितेर आओ मालिक, भितेर आओ, डरो झन।" यैक लिजी सीसरा ड्यार भितेर गो, और याएलल उकैं भली कैं कामोव ढगै दे। फिर सीसराल उधैं कौ, "मिकैं पाणितीस लागि रै, पाणि दे।" तब याएलल उकैं पिणक लिजी दूध दे, और वीक बाद फिर उकैं कामोव ढगै दे। सीसराल उधैं कौ, "तु ड्यारक द्वार ले ठाँड़ है रये। अगर क्वे लै मैस ऐबेर तुधैं पुछल कि त्वील यां कैकणी देखछा, तब तु कये, "ना, मील क्वे लै मैस कैं नि देख।"

लेकिन जब सीसरा सित गोय तब याएलल तम्बू बांदणी एक किल ले और दुसर हात मिं हतौड़ लिबेर माठू-माठ भितेर सीसराक पास गे, और वीक कनपट्टि मिं किल ठोकिबेर उकै मारि दे।

जब बारक सीसराक पिछ करन-करनै याएलक ड्यार तलक पुजौ तब याएल उनर दगाड़ भेट करणक लिजी भ्यार ऐ। और बारक धै कौ, "भितेर हिटो, जो मैस कै तुम चाणाछा, मी उकै तुमुकै दिखूल।" तब बारकल भितेर ऐबेर सीसरा कै मरी देखौ।"

इसिक प्रभु परमेश्वरल यौ दिन कनानी जातिक रॉज याबीन कै हरै दे।

गिदोनक बुलाई जाण

(न्यायियों ६:१-३२)

एक बार जब फिर यस हौ कि इस्रायली द्याप्तोक पुज करण लागीं, तब परमेश्वरल उनुकै सात सालक लिजी मिध्यानी जातियोंक हात मिं सौप दे। और मिध्यानी इस्रायलियों कै इदुक परेशान करछी, कि उनुकै उड्यार और फाँड़ों मिं लुकण पडौ। और जब इस्रायली बीं ब्वैछी, तब मिध्यानी अमालेकियों और पूरब दिशाक मैसोक दगाड़ ऐबेर उनुमिं हम्मल करछी। उं इस्रायलियोंक गाँड़ों मिं आपण ड्यार लगैबेर उनर पुर फसल बरबाद करि दिंछी, और इस्रायलियोंक भेड़-बकॉर, गोरु-भैस सब लुटिबेर उनर लिजी के ले नि छोड़छी। उं मैस और उनार ऊंट इदुक जादे छी, कि उनरि गिनती लै नि करी जै सकछी। और उनर उ देश बे वापिस जाण तलक पुर देश बरबाद है जांछी। तब इस्रायली परमेश्वर कै फिर पुकारण लागीं।

तब एक दिन परमेश्वरक दूतल गिदोन नामक एक जवान कै आपण दर्शन दे। उ बखत गिदोन मिध्यानियों बे लुकूणक लिजी एक अंगूरक कोलि मिं ग्यों चुटुणौछी। परमेश्वरक दूतल ऐबेर उधै कौ, "हे भादुर जवान, प्रभु परमेश्वर त्यर दगाड़ छु!" यौ सुणिबेर गिदोनल उधै कौ, "अगर परमेश्वर सांचि मिं हमर दगाड़ छन, तो फिर हमर दगाड़ यस किलै हौ? और उ अद्भुत काम कां छन, जनर बारि मिं हमर पुरखा बतूछी, कि प्रभु परमेश्वर हमुकै मिस देश बे निकालिबेर ल्या? जबकि आँब प्रभु परमेश्वरल हमुकै छोड़िबेर मिध्यानियोंक हात मिं दी है!" तब दूतल उधै कौ, "इस्रायलियों कै मिध्यानियोंक हात बे तु छुड़ालै। किलैकि परमेश्वर तुकै भेजणई।" वील कौ, "हे प्रभु, मी यौ इस्रायलियों कै कसिक छुडूं? किलैकि म्यर परिवार

मनश्शे कुलक सबों है नॉन छु, और मी आपण परिवार मिं लै सबों है नॉन छूं। मी क्वे खाश मैस न्हैतियूं।" लेकिन दूतल उधैं कौ, "परमेश्वर त्पर दगाड़ रौल। और तु मिध्यानियों कैं इसिक मारलै, जस उं त्पर सामण के न्हैतिन।"

फिर गिदोनल दूत धैं कौ, "अगर परमेश्वरक किरपा मि पर छु, तब तुम मिक्कै यौ साबित करिबेर दिखाओ, जैल मी तुमेरि बात मानि सकूं। जब तलक मी वापिस ऐबेर तुमुकैं खाँण नि खवूल, तब तलक तुम यैं रया।" दूतल कौ, "ठिक छु।" तब गिदोन बकरक पाँठक शिकार और खूब जादे र्वाट लिबेर आ।

यौ देखिबेर दूतल उधैं कौ, "शिकार और र्वाटों कैं लिबेर पखाण मिं धरि दे। और वीक माथि मिं शुरु खिति दिए।" वील उस्सै करौ। तब दूतल आपण जाँठक टुकल खाँण कैं छुड़ौ, और पखाण मिंबे आँग भ्यार निकलौ, जैल सब खाँण भसम करि दे। यैक बाद उ दूत वांबे गैब है गोय।

जब गिदोन यौ समझि गोय कि पक्क यौ मैस प्रभु परमेश्वरक दूत छी, तब वील भौतै डरिबेर कौ, "उइ जा, आँब मी जरूड़ मरि जूल, किलैकि मील परमेश्वरक दूत आपण सामण-सामणी देखौ।" लेकिन तब उकैं प्रभु परमेश्वरक यौ अवाज सुणाई दे, "तु शांत रौ और के फिकर नि कर, तुकैं के नि हो।"

तब गिदोनल प्रभु परमेश्वरक लिजी एक वेदी बणैबेर वीक नाम "परमेश्वर हमुकैं शांति दिंनी" धरौ। यौ वेदी आज लै उ जाँग मिं छु।

फिर उ रात प्रभु परमेश्वरल गिदोन धैं कौ, "आपण बौज्यूक सात सालक बल्द लिबेर आपण बौज्यूक बाल नामक द्यप्तक वेदी कैं टोड़ दिए। और वीक दगाड़ अशेराह देवीक खंभ कैं लै काटि दिए। यैक बाद तु म्यर लिजी उ जाँग मिं भल ढडल एक वेदी बणाये। और अशेरॉक खंभक लाकड़ों कैं उ आँग मिं खिति दिये, तब वां उ बल्द कैं म्यर लिजी बलिदान चढ़ै दिये। तब गिदोनल दस सेवकोंक दगाड़ जैबेर उस्सै करौ। वील यौ सब काम रात मिं यैक लिजी करौ, कि उकैं आपण बौज्यू और नगरॉक सब मैसोंक डर छी।

तब रात्ति उठिबेर वांक सब मैसोंल यौ सब देखौ, कि बाल द्यप्तक वेदी और अशेरॉक खंभ कैं लै गैब करि है, और उनर] जाँग मिं वां परमेश्वरक लिजी एक वेदी बणै रॉखी! तब मैसोंल आपस मिं कौ, "अरे, यौ काम कैल करौ?" और जब उनुकैं पत्त चलौ कि यौ काम योआशक च्यल गिदोनल करौ, तब नगरॉक सब मैसोंल योआश धैं कौ, "आपण च्यल गिदोन कैं

हमुकें सौंप दे, हम तकें मारनू, किलैकि तैल बालक वेदी और अशेरॉक खंभ कें टोड़ है!" लेकिन योआशल उनुधैं कौ, "तुम यौं सब बातोंक लिजी बहस नि करो! अगर बाल सांचि मिं ईश्वर छु, तो उ खुद गिदोन कें सजा किलै नि द्यल?" यौ सुणिबेर सब मैस वांबे चुपचाप लौट ग्याय।

परमेश्वरक अद्भुत निशाण

(न्यायियों ६:३४-४०)

यैक बाद प्रभु परमेश्वरक आत्मा गिदोन मिं उतरी, और गिदोनल भुकौर बजैबेर आपण गौंक मैसों कें बुला। वील इस्रायलक उत्तर दिशा मिं रुणी सब मैसों कें लै बुलवा, जनुल उ फौज बणै सको।

तब गिदोनल परमेश्वर धैं कौ, "हे प्रभु परमेश्वर, तुमुल मिधैं कौ, कि तुम इस्रायलियों कें म्यर जरियल छुड़ाला। ऐल तुम मिक्कें निशाण दिया कि यौ बात सांचि छु। देखो, मी खाव मिं उण धरनू, और जब रात मिं ओस पड़ेलि, और उ सॉर खाव कें छोड़िबेर उण मिं पड़ो, तब मी जाणि जूंल कि तुम म्यर जरियल इस्रायलियों कें छुड़ाला।

जब दुसर राति वील खाव मिं चा, तब उससै देखौ कि सब जांग सुकी छी, और उण ओसल भिज रौछी। वील उण कें निचोड़िबेर एक ब्याल पाणि जाँम करौ।

फिर गिदोनल परमेश्वर धैं कौ, "तुम किरपा करिबेर मिक्कें एक बात आइ कूण दियो। यौ बारि सॉर खाव भिजो, पर उण नि भिजो।" और उ रात परमेश्वरल यस्सै करौ। उण सुकी छी, और सॉर खाव मिं ओस पड़ि रैछी। तब वील परमेश्वरक बात और लै जादे सांचि मानी।

गिदोनक जरियल इस्रायलियोंक छुटकार

(न्यायियों ७:१-८)

जब गिदोनल भली कें अजमैबेर देखि ले कि परमेश्वर हमर दगाड़ छन, तब उ और वीक दगाड़ोंक सब मैसोंल राति उठिबेर डॉन मिं एक छ्वायक नजिक आपण ड्यार लगाई। और दुसर तरफ मिध्यानियोंक ड्यार उनर उत्तर दिशा मिं मोरे नामक घाटि मिं छी। लेकिन प्रभुल गिदोन धैं कौ, "त्यर दगाड़ जरवत हबेर जादे मैस छन। यौ कारणल मी मिध्यानियों कें तुमर हात मिं नि सौंप सकन, नतेरि इस्रायली फसक मारॉल कि उनुल आपण ताकतल मिध्यानियों कें हरा। यैक लिजी तु आपण सेना कें हुकुम दे, कि जो मैसों कें

डर लागणै, उं आपण-आपण घर लौट जाओ।" और यौ सुणिबेर बाइस हजार मैस वापिस आपण घर लौट ग्याय, जैल केवल दस हजार मैस वां बचीं।

यौ देखिबेर प्रभुल दुबार गिदोन धैं कौ, "आजि लै तौ मैस जादे छन। तु तनुकैं तेलि पाणिक छ्वाय मिं ली जा। वां मी तुकैं बतूल कि को-को ली जाण छन।"

यैक लिजी गिदोन इस्रायली सिपैनों कैं तलि छ्वायक पास लिबेर गो। वां प्रभु परमेश्वरल गिदोन धैं कौ, "तु जो सिपै पाणि कुकुरक चारि चपड़-चपड़ करिबेर प्याल, उनुकैं अलग करिये। वीक अलावा और जो घुनों मिं चौड़ हबेर आंचुइल पाणि प्याल, उनुकैं अलग करिये।" यैक बाद चपड़-चपड़ करिबेर पाणि पिणियोंकि गिनती तीन सौ निकली, लेकिन बाकि सिपै पाणि पिणिक लिजी घुनों मिं चौड़ हैराछी। प्रभुल गिदोन धैं कौ, "मी यौं तीन सौ सिपै जनुल चपड़-चपड़ करिबेर पाणि पे, इनुल तुमुकैं मिध्यानियों बे जितुल। और बाकि सबों कैं वापिस घर भेजि दे।"

तब गिदोनल तीन सौ सिपैनोंक अलावा सबों धैं कौ, "तुम वापिस घर न्हैं जाओ," और उं वापिस न्है ग्याय।

दुश्मणोंक ड्यारक भेद

(न्यायियों ७:६-१५)

मिध्यानियोंक ड्यार गिदोनक ड्यारोंक ताव बे डॉनक घाटि मिं छी। उ रातै प्रभुल गिदोन धैं कौ, "उठो, और मिध्यानियों मिं हम्मल करो। किलैकि मील उनुकैं त्यर हात मिं सौंप है। लेकिन अगर तुकैं डर लागुं, तब पैली तु आपण सेवक पूराह कैं आपण दगाड़ लिबेर मिध्यानियोंक ड्यार मिं जा। वां जैबेर तु उनेरि बात-चीत सुणिये, कि उं के बात करणई। उनेरि बात सुणिबेर तुमेरि हिम्मत बढ़ जालि। और वीक बाद तुम उनुमिं हम्मल करि सकला।"

तब गिदोन आपण सेवक पूराहक दगाड़ मिध्यानियोंक ड्यारक नजिक गो। जब गिदोन उनर ड्यारक नजिक पुजौ, तब एक मैस आपण दगडु कैं आपण स्वीण बतूणौछी। उ कूणौछी, "मील यौ स्वीण देखौ, कि जौंक एक र्वट घुरिबेर हमर ड्यार तलक आ। और वीक ढयस्ल हमर ड्यार ढै गोय, और हमर पुर ड्यार उलट-पुलट है गोय।" यौ सुणिबेर वीक दगडुवल कौ, "यैक मतलब यस ह्वल, कि परमेश्वरल हमुकैं इस्रायली गिदोनक हात मिं दी है!"

जब गिदोनल उनेरि बात सुणी, तब वील धरति मिं चौड़ हबेर परमेश्वरक अराधना करी। और ड्यार मिं लौटिबेर इस्रायलियों धें कौ, "प्रभुल मिध्यानियों कें हमर हात मिं सौंप है।"

इस्रायलियोंक जीत

(न्यायियों ७:१६-२३)

यैक लिजी गिदोनल आपण उं तीन सौ सिपैनोंक तीन अलग-अलग दल बणाई। और हरेकक हात मिं एक-एक भुकौर और घड़ दे, जनर भितेर मशाल छी। गिदोनल उनुधें कौ, "तुम मिंके चाया, और जस मी उनर ड्यारक नजिक पुजिबेर करुल, उस्सै तुम लै करिया। और जब मी और म्यर दलॉक मैस भुकौरों कें बजूल, तब तुम लड़ैक यौ नॉर जोर-जोरल लगाया, "प्रभुक लिजी, गिदोनक लिजी!"

फिर गिदोन और वीक दगडु अधरात मिं चुपचाप मिध्यानियोंक ड्यारक नजिक पुर्जी। और उनुल वां भुकौर बजैबेर आपण-आपण घड़ फोड़ि देई। और उनार दगाड़-दगाड़ै दुसॉर द्वी दलॉक मैसॉल लै आपण-आपण घड़ों कें फोड़िबेर आपण हात मिं मशाल थामिबेर जगाई। और भुकौरों कें बजैबेर जोर-जोरल नॉर लै लगाई, "प्रभुक लिजी, गिदोनक लिजी, तलवार चलाओ!" उनुल मिध्यानियों मिं हम्मल नि कर, लेकिन उनर ड्यारोंक चारों तरफ ठाँड़ है ग्याय। और यौ सब अवाज सुणिबेर और मशालोंक उज्याव देखिबेर मिध्यानियों कें भौतै डर लागी, और यौ सोचिबेर कि गिदोनक सेना हमेरि बीच मिं छु, तब उं सब अन्यार मिं हड़बड़ैबेर आपणै दगडुवों कें तलवारल मारण लागीं। और जो मैस यौ मार-काट मिं बचीं, उं भौत दूर भाजि ग्याय।



भुकौर और मशाल थामी गिदोन

तब गिदोनल दुसॉर इस्रायली मैसों कें आपण दगाड़ बुलैबेर मिध्यानियोंक पिछ करौ, और उनुकें सब तरफ बे हरै दे।

इस्रायलियोंक बर्बादिक बाँट

(न्यायियों ८:३३, २१:२५)

लेकिन गिदोनक मौतक बाद इस्रायली मैस फिर बिगड़ गया। उं लौटिबेर फिर बाल नामक द्याप्तक पुज करण लागीं। और उकै आपण ईश्वर मानिबेर उनुल परमेश्वरक दगाड़ एक धंध करणवालि स्यैणिक चारि भरौस टोड़ौ। और इस्रायली आपण सांचि प्रभु परमेश्वर कैं भुल गया, जनुल उनुकै आज तलक चारों तरफाँक उनार सब दुश्मणों बे बचाछी। और जो भौल काम गिदोनल उनर लिजी करछी, उनुल वीक बदाव मिं गिदोन और वीक परिवारक दगाड़ लै भल बर्ताव नि कर।

उदिनान इस्रायल मिं क्वे रॉज नि छी, यैक लिजी जस मैसों कैं भल लागछी उं उस्सै करछी।